

Pa recorda grandioso aubade oficial di 1976

3 di Maart proximo ta inicia celebracion di 30 año di Himno y Bandera y 20 año di Status Aparte

STA. CRUZ--Na Maart proximo ta inicia celebracion di doble lustro: 30 año di Himno y Bandera y 20 año di Status Aparte. Directamente despues di carnaval, Ministerio di Cultura hunto cu Comision 50 (30 pa himno y bandera, mas 20 pa Status Aparte) y Comision Celebracion Dianan Nacional ta inicia 3 di Maart proximo e celebracion cu un misa eucumenico, sigui pa un aubade na nos Himno y Bandera recordando e prome biaha cu Aruba a hisa su bandera y a canta su himno.

Dia 3 di Maart proximo, pa reviva e sentimiento patriotico di comunidad cu a biba e momentonan ey y pa educa esnan cu a bini acerca despues di e acontecimiento historico cu a tuma lugar na Maart 1976, lo tin un reconstruccion di e manifestacion cu a

tuma lugar 30 año pasa den Stadion Wilhelmina (awor G.P. Trinidad na Dakota). Aki tabata na unda pa prome biaha Arubianonan consciente y orguyoso a mira e bandera di Aruba bay laira y a canta “Aruba Dushi Tera” prome biaha, oficialmente como himno. Awe casi 30 año despues e colornan di nos bandera ta luci tur caminda y nos himno ta resona, simbolizando un pueblo. Ministerio di Cultura y Comision 50 en cooperacion cu Comision Celebracion Dianan Nacional (CCDN) ta recorda e momento historico di 1976 unda ta sali for di e plaza dilanti di Djispi's cu un marcha di flambew cu lo termina na e stadion, mescos cu a pasa e tempo ey. Ta invita tur esnan cu e tempo ey tabata envolvi pa participa e biaha aki atrobe y bini cu yiu, nieto y bisanietonan pa recorda nos historia. Mas cu



claro, pa enculcra a hobennan invitando schoolnan, padvindernan y demas grupo uniforma pa ta presente na e aubade y show di e anochi cual lo tuma lugar na Stadion e anochi di dia 3 di Maart proximo. Na stadion publico lo goza di un espectáculo

sin igual cu expresionnan cultural artistico di e.o. John Freddy Montoya, grupo di Maybeline Arends Croes, video documental, como tambe un espectáculo pirotecnico (vuurwerk manera crioyamente nos ta bisa) sin igual y inolvidabel.

Sin duda un show di caliber, digno di un magno evento, lo ta un atraccion pa grandi y chikito.

Grandi y chikito ta ser pidi di awor caba pa reserva e fecha patriotico aki y prepara pa participa activamente na e espectáculo.